

**Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije**

NACRT

**Z A K O N
O UPRAVLJANJU DRŽAVNIM KAPITALOM U
PRIVREDNIM DRUŠTVIMA U FEDERACIJI BOSNE I HERCEGOVINE**

Mostar, 06.09.2011. godine

**ZAKON
O UPRAVLJANJU DRŽAVNIM KAPITALOM U
PRIVREDNIM DRUŠTVIMA U FEDERACIJI BOSNE I HERCEGOVINE**

I – OPŠTE ODREDBE

Član 1.

Ovim Zakonom uređuje se: upravljanje državnim kapitalom, osnivanje, vršenje ovlaštenja po osnovu učešća državnog kapitala, administrativna kontrola akata, posebne odredbe o postupku u javnim registrima, plaće i naknade u privrednim društvima sa učešćem državnog kapitala u Federaciji Bosne i Hercegovine.

Član 2.

U Federaciji Bosne i Hercegovine, ovlaštenja po osnovu učešća državnog kapitala u privrednim društvima vrše opština, grad, kanton i Federacija Bosne i Hercegovine, svako u okviru svojih nadležnosti.

U privrednim društvima sa učešćem državnog kapitala koja nisu u nadležnosti Federacije Bosne i Hercegovine, vršenje ovlaštenja po osnovu učešća državnog kapitala svojim propisima uređuju opštine, gradovi i kantoni Federacije Bosne i Hercegovine (u daljem tekstu: drugi nivoi vlasti), svako u okviru svojih nadležnosti.

Član 3.

Pojedini pojmovi u smislu ovog Zakona imaju slijedeće značenje:

- **organi Federacije Bosne i Hercegovine** su Vlada Federacija Bosne i Hercegovine i federalni organi uprave, definisani Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05),
- **privredno društvo sa učešćem državnog kapitala** je privredno društvo u kojem ovlaštenja po osnovu učešća državnog kapitala vrše organi Federacije Bosne i Hercegovine, bez obzira na visinu tog učešća,
- **privredno društvo sa većinskim učešćem državnog kapitala** je privredno društvo u kojem ovlaštenja po osnovu učešća državnog kapitala vrše organi Federacije Bosne i Hercegovine i u čijem osnovnom kapitalu državni kapital učestvuje sa više od 50%,
- **vršenje ovlaštenja po osnovu učešća državnog kapitala** obuhvata ostvarivanje prava dioničara ili članova privrednih društva sa učešćem državnog kapitala u skladu sa propisima koji uređuju prava i obaveze dioničara i članova privrednih društava;
- **zavisno društvo** je privredno društvo u čijem osnovnom kapitalu privredno društvo sa većinskim učešćem državnog kapitala ima više od 50% dionica ili udjela, kao vladajuće društvo;
- **administrativna kontrola akata** je postupak kontrole usklađenosti odgovarajućih akata privrednih društava sa većinskim učešćem državnog kapitala i

akata zavisnih društava sa zakonima, podzakonskim aktima i propisima Evropske unije;

- **javni registri** su Registar poslovnih subjekata koji vode nadležni registarski sudovi u Federaciji Bosne i Hercegovine, Registar vrijednosnih papira u Federaciji Bosne i Hercegovine i drugi registri u kojim se evidentiraju podaci o privrednim društvima.

II – VRŠENJE OVLAŠTENJA U PRIVREDNIM DRUŠTVIMA SA UČEŠĆEM DRŽAVNOG KAPITALA

1. Osnivanje i privredna društva od strateškog interesa

Član 4.

Privredno društvo sa 100% učešćem državnog kapitala može se osnovati posebnim zakonom.

Vlada Federacije Bosne i Hercegovine odlukom može osnovati privredno društvo sa 100% učešćem državnog kapitala kada ocjeni da je osnivanje takvog privrednog društva od interesa za Federaciju Bosne i Hercegovine ili za poslovanje privrednih društava sa učešćem državnog kapitala.

Član 5.

Vlada Federacije Bosne i Hercegovine, za pojedino privredno društvo sa učešćem državnog kapitala koje obavlja djelatnosti u oblasti od interesa za Federaciju Bosne i Hercegovine uključujući ali i ne ograničavajući se na: energetiku, industriju naoružanja i vojne opreme, komunikacije, komunalne djelatnosti i upravljanje javnim dobrima, odlukom može utvrditi da je privredno društvo od strateškog interesa za Federaciju Bosne i Hercegovine na koju saglasnost daje Parlament Federacije Bosne i Hercegovine.

U privrednim društvima od strateškog interesa za Federaciju Bosne i Hercegovine, postupak stečaja i likvidacije, prinudnog izvršenja na pokretnoj i nepokretnoj imovini i prinudnog izvršenja blokadom računa kod poslovnih banaka, može se pokrenuti i provesti samo uz prethodnu saglasnost Vlade Federacije Bosne i Hercegovine, koju pribavlja sud ili drugi nadležni organ pred kojim se vodi postupak.

U privrednim društvima iz stava 1. ovog člana, u kojim je prije stupanja na snagu ovog zakona neki od postupaka iz stava 2. ovog člana pokrenut ili proveden, sud ili drugi nadležni organ pred kojim se vodi postupak, na osnovu zahtjeva i odluke Vlade Federacije Bosne i Hercegovine iz stava 1. ovog člana, obustavit će postupak i ukinuti sve donesene odluke.

Ukoliko Vlada Federacije Bosne i Hercegovine uskrati saglasnost iz stava 2. ovog člana ili uputi zahtjev iz stava 3. ovog člana, solidarno odgovara za naplatu potraživanja radi kojih je pokrenut postupak stečaja ili likvidacije, prinudnog izvršenja na pokretnoj ili nepokretnoj imovini ili prinudnog izvršenja blokadom računa kod poslovnih banaka.

2. Način vršenja ovlaštenja u privrednim društvima sa učešćem državnog kapitala

Član 6.

U privrednim društvima sa učešćem državnog kapitala iz nadležnosti Federacije Bosne i Hercegovine, ovlaštenja po osnovu učešća državnog kapitala vrši Vlada Federacije Bosne i Hercegovine neposredno ili putem federalnih organa uprave.

Član 7.

Vlada Federacije Bosne i Hercegovine posebnom odlukom utvrđuje listu privrednih društava iz nadležnosti Federacije Bosne i Hercegovine u kojim ovlaštenja po osnovu učešća državnog kapitala vrše organi Federacije Bosne i Hercegovine (u daljem tekstu: Lista), koja se objavljuje u „Službenim novinama Federacije BiH“.

Vlada Federacije Bosne i Hercegovine, posebnom odlukom o izmjeni odluke iz stava 1. ovog člana, može vršenje ovlaštenja po osnovu učešća državnog kapitala u privrednom društvu iz nadležnosti Federacije Bosne i Hercegovine prenijeti na drugi nivo vlasti, uz obavezno pribavljanje prethodne saglasnosti nadležnog organa nivoa vlasti na koji se ovlaštenja prenose.

Vlada Federacije Bosne i Hercegovine, posebnom odlukom o dopuni odluke iz stava 1. ovog člana, može vršenje ovlaštenja po osnovu učešća državnog kapitala u privrednom društvu iz nadležnosti drugih nivoa vlasti prenijeti u nadležnost Federacije Bosne i Hercegovine, uz obavezno pribavljanje prethodne saglasnosti nadležnog organa nivoa vlasti sa kojeg se ovlaštenja prenose.

Odluke iz st. 2. i 3. ovog člana Vlada Federacije Bosne i Hercegovine može donijeti ukoliko prethodno utvrdi da je prenos vršenja ovlaštenja po osnovu učešća državnog kapitala u privrednom društvu od interesa za Federaciju Bosne i Hercegovine, drugi nivo vlasti ili za poslovanje privrednih društava sa učešćem državnog kapitala.

3. Odlučivanje na skupštini

Član 8.

Pravo učestvovanja u radu i odlučivanju skupštine privrednog društava sa učešćem državnog kapitala organi Federacije Bosne i Hercegovine ostvaruju putem punomoćnika koji je u svemu dužan postupati u skladu sa dobijenim pismenim obavezujućim uputstvima organa Federacije Bosne i Hercegovine koji vrši ovlaštenja po osnovu učešća državnog kapitala u tom privrednom društvu.

Član 9.

Organ Federacije Bosne i Hercegovine koji pravo učestvovanja u radu i odlučivanju skupštine privrednog društava sa učešćem državnog kapitala ostvaruje putem punomoćnika, za svaku sazvanu skupštinu punomoćniku daje punomoć u pisanoj formi, koja obavezno sadrži:

- naziv i sjedište davaoca punomoći/organa Federacije Bosne i Hercegovine koji putem punomoćnika ostvaruje ovlaštenja u radu i odlučivanju skupštine privrednog društva,
- ime i prezime punomoćnika, ime jednog roditelja, adresa stanovanja, JMB, broj lične karte i naziv organa koji je izdao ličnu kartu,
- dnevni red sazvane skupštine sa obavezujućim uputstvom o načinu glasanja po svakoj pojedinoj tački dnevnog reda, tako da pored svake tačke dnevnog reda mora izričito biti navedeno: „glasati za” ili „glasati protiv” ili „biti suzdržan” ili „ne glasati” ili drugi odgovarajući način glasanja,
- druga odgovarajuća obavezujuća uputstva koja se odnose na učestvovanje u raspravi, predlaganje i glasanje za skidanje pojedinih tačaka sa dnevnog reda, predlaganje i glasanje za odgađanje skupštine,
- naznaku da punomoćnik nema ovlaštenje da učestvuje u radu i odlučivanju sazvane skupštine izvan tačaka dnevnog reda navedenog u punomoći,
- broj, mjesto i datum izdavanja punomoći,
- potpis punomoćnika i
- potpis rukovodioca i pečat organa Federacije Bosne i Hercegovine.

Član 10.

Privredno društvo sa učešćem državnog kapitala dužno je najkasnije 15 dana prije dana održavanja skupštine organu Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu dostaviti poziv za zakazanu skupštinu sa dnevnim redom i materijalima za svaku tačku dnevnog reda.

Punomoć za učešće u radu i odlučivanju skupštine društva dostavlja se privrednom društvu sa učešćem državnog kapitala putem pošte, faksa ili elektronske pošte, najkasnije tri dana prije dana održavanja skupštine.

Punomoćnik je dužan originalni primjerak punomoći predati nadležnom organu privrednog društva, najkasnije neposredno prije početka skupštine.

Ukoliko punomoć ne sadrži bilo koji dio obaveznog sadržaja iz člana 9. alineja 1. do 8. ovog Zakona punomoćnik ne može učestvovati u radu i odlučivanju skupštine.

Član 11.

Organ Federacije Bosne i Hercegovine koji je dao punomoć za učestvovanje u radu i odlučivanju skupštine privrednog društava sa učešćem državnog kapitala, može opozvati punomoć ili umjesto već date punomoći dati novu punomoć najkasnije do održavanja skupštine.

Ukoliko organ Federacije Bosne i Hercegovine, u roku od sedam dana od dana održane skupštine, privrednom društvu dostavi akt kojim pobija valjanost punomoći na osnovu koje je punomoćnik učestvovao u radu i odlučivanju skupštine, nadležni organ privrednog društva će proglasiti nevažećim glasove po osnovu te punomoći i o tome pismeno obavjestiti sazivača skupštine.

Sazivač skupštine je dužan obustaviti od izvršenja odluku za čije donošenje su bili odlučujući glasovi po osnovu punomoći iz stava 2. ovog člana i sazvati skupštinu radi ponovnog odlučivanja o tim pitanjima, najkasnije 30 dana od dana prijema obavještenja nadležnog organa privrednog društva.

4. Nadzorni odbor

Član 12.

Izbor kandidata za imenovanje članova nadzornih odbora ispred državnog kapitala vrši se u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03).

Postupak iz stava 1. ovog člana provodi komisija imenovana od organa Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu.

Komisija iz stava 2. ovog člana, nakon okončanog postupka izbora sačinjava listu najuspješnijih kandidata, na osnovu koje rukovodilac organa Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu, Vladi Federacije Bosne i Hercegovine upućuje prijedlog za utvrđivanje prijedloga kandidata za članove nadzornog odbora ispred državnog kapitala.

U skladu sa prijedlogom koji utvrdi Vlada Federacije Bosne i Hercegovine, imenovanje članova nadzornih odbora ispred državnog kapitala vrši skupština privrednog društva.

Član 13.

Izuzetno, bez provođenja postupka iz člana 12. ovog Zakona, Vlada Federacije Bosne i Hercegovine, na prijedlog rukovodioca organa Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu, može utvrditi prijedlog kandidata za članove nadzornog odbora ispred državnog kapitala koji se imenuju na period do 60 dana, u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03).

U skladu sa prijedlogom kandidata iz stava 1. ovog člana, imenovanje članova nadzornih odbora ispred državnog kapitala vrši skupština privrednog društva na period do 60 dana, počev od dana stupanja na snagu odluke skupštine o imenovanju članova nadzornog odbora.

Član 14.

Za člana nadzornog odbora privrednog društva ispred državnog kapitala ne može biti predloženo ili imenovano lice:

- za čiji izbor i imenovanje postoje smetnje utvrđene važećim propisima koji regulišu ovu oblast i
- koje je zaposlenik tog privrednog društva, osim u slučaju kada Vlada Federacije Bosne i Hercegovine utvrdi da je to od posebnog interesa za određeno privredno društvo, a što zavisi od djelatnosti koju privredno društvo obavlja.

Za jednog člana nadzornog odbora ispred državnog kapitala u privrednom društvu sa većinskim učešćem državnog kapitala imenuje se kandidat kojeg predloži Savez samostalnih sindikata Bosne i Hercegovine.

Lice koje se predlaže ili imenuje za člana nadzornog odbora ispred državnog kapitala mora imati najmanje završeno visoko obrazovanje (VSS), najmanje pet godina radnog iskustva u struci nakon završenog visokog obrazovanja i odgovarajuće stručno zvanje i iskustvo.

Aktom o osnivanju i/ili statutom privrednog društva sa učešćem državnog kapitala utvrđuje se potrebno stručno zvanje i iskustvo iz stava 3. ovog člana, a mogu biti utvrđeni i dodatni uslovi za članstvo u nadzornom odboru tog privrednog društva.

Član 15.

Član nadzornog odbora imenovan ispred državnog kapitala dužan je:

- postupati u skladu sa obavezujućim uputstvima organa Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu, a ako uputstva nije dobio, u skladu sa razumnom procjenom najboljeg interesa državnog kapitala i
- redovno, a najmanje jednom u tri mjeseca, dostaviti pismeni izvještaj o radu nadzornog odbora organu Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu.

U privrednim društvima sa većinskim učešćem državnog kapitala, pismeni izvještaj iz stava 1. alineja 2. ovog člana usvaja i dostavlja nadzorni odbor tog privrednog društva.

Član 16.

Razrješenje dužnosti prije isteka mandata članova nadzornih odbora privrednih društava imenovanih ispred državnog kapitala vrši skupština privrednog društva na osnovu prethodne saglasnosti Vlade Federacije Bosne i Hercegovine.

Članu nadzornog odbora koji je imenovan umjesto razriješenog člana, kada se ne razrješava cijeli nadzorni odbor, mandat traje do isteka mandata članova nadzornog odbora koji su imenovani prilikom imenovanja cijelog nadzornog odbora, a nisu razriješeni.

Član 17.

Član nadzornog odbora imenovan ispred državnog kapitala, kojem je mandat istekao ili je razriješen dužnosti prije isteka mandata, dužan je izvršiti primopredaju dužnosti u roku i na način kako je to utvrđeno aktom organa Federacije Bosne i Hercegovine ili aktom skupštine tog privrednog društva.

5. Uprava

Član 18.

Izbor kandidata za članove uprave privrednih društava sa većinskim učešćem državnog kapitala vrši organ utvrđen statutom tog privrednog društva (u daljem tekstu: nadležni organ) na osnovu objavljenog javnog konkursa u skladu sa unaprijed utvrđenim uslovima koje kandidati trebaju ispunjavati.

Nakon okončanog postupka izbora kandidata u skladu sa stavom 1. ovog člana nadležni organ sačinjava i dostavlja listu najuspješnijih kandidata organu

Federacije koji vrši ovlaštenja po osnovu učešća državnog kapitala u tom privrednom društvu.

Vlada Federacije Bosne i Hercegovine, na prijedlog organa Federacije iz stava 2. ovog člana, donosi odluku o davanju prethodne saglasnosti za imenovanje članova uprave.

U skladu sa odlukom Vlade Federacije Bosne i Hercegovine kojom je data prethodna saglasnost za imenovanje članova uprave, nadležni organ društva sa većinskim učešćem državnog kapitala donosi odluku o imenovanju članova uprave.

Član 19.

Izuzetno, bez provođenja postupka iz člana 18. ovog Zakona, Vlada Federacije Bosne i Hercegovine, na prijedlog rukovodioca organa Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu, može donijeti odluku o davanju prethodne saglasnosti za imenovanje vršilaca dužnosti članova uprave privrednog društva sa većinskim učešćem državnog kapitala na period do šest mjeseci.

U skladu sa odlukom Vlade Federacije Bosne i Hercegovine iz stava 1. ovog člana, nadležni organ društva sa većinskim učešćem državnog kapitala donosi odluku o imenovanju vršilaca dužnosti članova uprave na period do šest mjeseci, počev od dana stupanja na snagu odluke nadležnog organa o imenovanju vršilaca dužnosti članova uprave.

Član 20.

Razrješenje dužnosti prije isteka mandata članova uprave privrednih društava sa većinskim učešćem državnog kapitala vrši nadležni organ privrednog društva na osnovu prethodne saglasnosti Vlade Federacije Bosne i Hercegovine.

Članu uprave privrednog društva sa većinskim učešćem državnog kapitala koji je imenovan umjesto razriješenog člana, u slučaju kada se ne razriješava cijela uprava privrednog društva, mandat traje do isteka mandata članova uprave privrednog društva koji su imenovani prilikom imenovanja cijele uprave privrednog društva, a nisu razriješeni.

Član 21.

Član uprave privrednog društva sa većinskim učešćem državnog kapitala kojem je mandat istekao ili je razriješen dužnosti prije isteka mandata dužan je izvršiti primopredaju dužnosti u roku i na način kako je to utvrđeno aktom organa Federacije Bosne i Hercegovine ili aktom nadzornog odbora tog privrednog društva.

III – EVIDENCIJA I ADMINISTRATIVNA KONTROLA AKATA

Član 22.

Privredna društava sa većinskim učešćem državnog kapitala, dužna su organu Federacije Bosne i Hercegovine koji u tom društvu vrši ovlaštenja po osnovu većinskog učešća državnog kapitala dostavljati obavještenja o značajnim događajima za privredno društvo ili za zavisna društva, uključujući obavještenja o: sklapanju ili

raskidanju poslovnih ugovora veće vrijednosti, namjeri osnivanja drugih privrednih društava smostalno ili zajedno sa drugim pravnim ili fizičkim licima, namjeri vršenja statusnih promjena, obustavljanju proizvodnje, blokadi računa, nastanku dugovanja veće vrijednosti, štrajku, prestanku isporuke sirovina i druga.

Privredna društava sa većinskim učešćem državnog kapitala, dužna su odmah, a najkasnije u roku od tri dana od dana donošenja, organu Federacije Bosne i Hercegovine koji u tom društvu vrši ovlaštenja po osnovu većinskog učešća državnog kapitala radi vođenja evidencije dostaviti primjerak: odluka o razrješenju i imenovanju članova nadzornog odbora i članova uprave, odluka o razrješenju i imenovanju članova nadzornog odbora i članova uprave zavisnih društava, polugodišnjeg i godišnjeg seta finansijskih izvještaja i godišnjeg konsolidovanog finansijskog izvještaja.

Član 23.

Privredna društava sa većinskim učešćem državnog kapitala, dužna su organu Federacije Bosne i Hercegovine koji u tom društvu vrši ovlaštenja po osnovu većinskog učešća državnog kapitala, radi administrativne kontrole akata, dostavljati:

- statut i izmjene i dopune statuta;
- poslovnik o radu skupštine i izmjene i dopune poslovnika o radu skupštine;
- poslovnik o radu nadzornog odbora i izmjene i dopune poslovnika o radu nadzornog odbora;
- poslovnik o radu uprave i izmjene i dopune poslovnika o radu uprave;
- etički kodeks i izmjene i dopune etičkog kodeksa;
- pravilnik o izboru i imenovanju članova uprave i izmjene i dopune pravilnika o izboru i imenovanju članova uprave;
- pravilnik o načinu izbora vanjskog revizora i izmjene i dopune pravilnika o načinu izbora vanjskog revizora;
- pravilnik o izboru i imenovanju odbora za reviziju i izmjene i dopune pravilnik o izboru i imenovanju odbora za reviziju;
- odgovarajući akt kojim je propisan postupak prijema zaposlenika, pripravnika i volontera i izmjene i dopune ovog akta;
- pravilnik o unutrašnjoj organizaciji ili drugi odgovarajući akt kojim su utvrđene organizacione jedinice i njihov djelokrug, podružnice i njihov djelokrug, ovlaštenja i odgovornosti rukovodilaca organizacionih jedinica i podružnica i sistematizacija radnih mjesta i izmjene i dopune ovog akta;
- ugovore kojim su regulisani položaj, ovlaštenja, odgovornosti, prava, naknade i/ili plaće članova nadzornog odbora i uprave i anekse ovih ugovora;
- druge akte predviđene propisom iz člana 25. stav 4. ovog zakona.

Privredna društava sa većinskim učešćem državnog kapitala, dužna su organu Federacije Bosne i Hercegovine koji u tom društvu vrši ovlaštenja po osnovu većinskog učešća državnog kapitala, radi administrativne kontrole akata iz stava 1. ovog člana, dostavljati i odgovarajuće akte svojih zavisnih društava.

Član 24.

Privredna društava sa većinskim učešćem državnog kapitala, dužna su organu Federacije Bosne i Hercegovine koji u tom privrednom društvu vrši ovlaštenja po osnovu većinskog učešća državnog kapitala, radi administrativne kontrole akata,

dostavljati akte iz člana 23. ovog zakona najkasnije 15 dana od dana stupanja na snagu tih akata.

Akte iz člana 23. ovog zakona koji su doneseni prije stupanja na snagu ovog zakona, privredna društava sa većinskim učešćem državnog kapitala dužna su uskladiti sa odredbama ovog zakona i radi administrativne kontrole akata dostaviti organu Federacije Bosne i Hercegovine koji u tom privrednom društvu vrši ovlaštenja po osnovu većinskog učešća državnog kapitala, najkasnije šest mjeseci od dana stupanja na snagu ovog zakona.

Član 25.

Administrativnu kontrolu akata privrednog društava sa većinskim učešćem državnog kapitala i njegovih zavisnih društava vrši komisija koju imenuje organ Federacije Bosne i Hercegovine, koji u tom privrednom društvu vrši ovlaštenja po osnovu većinskog učešća državnog kapitala.

Komisija iz stava 1. ovog člana, nakon provedenog postupka administrativne kontrole akata daje pismeno mišljenje o usklađenosti odgovarajućeg akta sa zakonima, podzakonskim aktima i propisima Evropske unije.

Ukoliko mišljenje iz stava 2. ovog člana sadrži primjedbe na kontrolisani akt, privredno društvo sa većinskim učešćem državnog kapitala, dužno je u ostavljenom roku otkloniti iznesene primjedbe ili dostaviti obrazloženje o razlozima radi kojih primjedbe nije moguće otkloniti u ostavljenom roku.

Postupak vršenja administrativne kontrole akata, rokovi za postupanje, visina i način izmirivanja troškova postupka bliže se uređuju propisom koji donosi Vlada Federacije Bosne i Hercegovine.

Aktom o imenovanju komisije iz stava 1. ovog člana, koji se objavljuje u „Službenim novinama Federacije BiH“, određuje se sastav komisije, vrijeme na koje se komisija imenuje i naknada za rad komisije.

IV – POSEBNE ODREDBE O POSTUPKU ZA UPIS I PROMJENU PODATAKA U JAVNIM REGISTRIMA

Član 26.

U javnim registrima, postupak upisa i promjene podataka o privrednim društvima u kojim ovlaštenja po osnovu učešća državnog kapitala vrše organi Federacije Bosne i Hercegovine provodi se prema odredbama važećih zakona koji regulišu ovu oblast, ako ovim Zakonom nije drugačije određeno.

Član 27.

U javnim registrima koji pored ostalih podataka o privrednim društvima evidentiraju i podatke o organima Federacije Bosne i Hercegovine koji u privrednim društvima vrše ovlaštenja po osnovu učešća državnog kapitala, upis i promjena ovih podataka vrši se na osnovu odluka Vlade Federacije Bosne i Hercegovine iz člana 7. ovog Zakona i zahtjeva organa Federacije Bosne i Hercegovine na koji se upis ili promjena podataka odnosi.

U postupku upisa i promjene podataka iz stava 1. ovog člana, organi Federacije Bosne i Hercegovine oslobođeni su plaćanja svih taksi i naknada.

Član 28.

Naplata potraživanja po osnovu neplaćenih taksi i naknada koje se plaćaju u postupcima upisa i promjene podataka u javnim registrima ne može biti uslov za izvršenje zahtjevanog upisa i promjene podataka ako se postupak vodi po zahtjevu privrednih društava sa učešćem državnog kapitala.

Naplata potraživanja iz stava 1. ovog člana, javni registri mogu ostvarivati u sudskom ili drugom odgovarajućem postupku, ali isključivo izvan postupaka upisa i promjene podataka u javnim registrima koji se vode po zahtjevu privrednih društava sa učešćem državnog kapitala.

Član 29.

Javni registri koji pored ostalih podataka evidentiraju i podatke koji se odnose na nadzorne odbore i uprave privrednih društava sa većinskim učešćem državnog kapitala, evidentiranje prvog imenovanja i svakog novog imenovanja i razrješenja članova nadzornih odbora i uprava ovih privrednih društava mogu vršiti isključivo ukoliko podnosilac zahtjeva za evidentiranje promjena pored ostalih potrebnih dokumenata dostavi i odgovarajući akt Vlade Federacije Bosne i Hercegovine iz čl. 12., 13., 16., 18., 19. i/ili 20.

V – PLAĆE I NAKNADE

Član 30.

Ukoliko privredno društvo sa većinskim učešćem državnog kapitala u godišnjem obračunu iskaže gubitak, u tom privrednom društvu u roku od 30 dana uvode se mjere za smanjenje troškova poslovanja uz obavezno uvođenje mjere smanjenja tri uzastopne mjesečne plaće zaposlenika tog privrednog društva, uključujući plaće i naknade članova nadzornog odbora, uprave i odbora za reviziju, i to na način da se:

- članovima uprave i svim zaposlenicima tog privrednog društva isplaćuje plaća u istom iznosu u visini najniže neto plaće isplaćene u predhodna tri mjeseca u Federaciji Bosne i Hercegovine, prema posljednjem objavljanom podatku Federalnog zavoda za statistiku i

- naknade članova nadzornog odbora i odbora za reviziju smanje za 50% u odnosu na iznose isplaćivane u godini za koju je iskazan gubitak.

U slučaju smanjenja mjesečnih plaća i naknada iz stava 1. ovog člana isključuje se primjena odredaba važećih kolektivnih ugovora, ugovora o radu i drugih akata kojim su utvrđeni iznosi ili najniži iznosi plaća i naknada.

Član 31.

Mjesečna naknada za rad predsjednika nadzornih odbora privrednih društava sa većinskim učešćem državnog kapitala i njihovih zavisnih društava može biti utvrđena najviše do 1,5 prosječne neto plaće isplaćene u Federaciji Bosne i Hercegovine u prethodna tri mjeseca prema posljednjem objavljenom podatku Federalnog zavoda za statistiku.

Mjesečna naknada za rad članova nadzornih odbora privrednih društava sa većinskim učešćem državnog kapitala i njihovih zavisnih društava iznosi 80% od iznosa mjesečne naknade utvrđene za predsjednika tog nadzornog odbora.

Mjesečna naknada iz st. 1. i 2. ovog člana reguliše se ugovorom koji se zaključuje na period imenovanja uz pismenu saglasnost organa Federacije Bosne i Hercegovine koji u tom privrednom društvu sa većinskim učešćem državnog kapitala vrši ovlaštenja po osnovu većinskog učešća državnog kapitala.

Član 32.

Mjesečna neto plaća za članove uprave privrednih društava sa većinskim učešćem državnog kapitala i njihovih zavisnih društava koju čini direktor, ili direktor i jedan ili više izvršnih direktora može biti utvrđena najviše u iznosu do pet prosječnih mjesečnih neto plaća isplaćenih u Federaciji Bosne i Hercegovine u prethodna tri mjeseca prema posljednjem objavljenom podatku Federalnog zavoda za statistiku.

Mjesečna plaća iz stava 1. ovog člana reguliše se ugovorom koji se zaključuje na period imenovanja uz pismenu saglasnost organa Federacije Bosne i Hercegovine koji u tom privrednom društvu sa većinskim učešćem državnog kapitala vrši ovlaštenja po osnovu učešća državnog kapitala.

Mjesečna neto plaća zaposlenika privrednog društva sa većinskim učešćem državnog kapitala ne može biti utvrđena u iznosu višem od iznosa neto plaće članova uprave tog privrednog društva utvrđenog u skladu sa stavom 1. ovog člana.

Član 33.

Jednom godišnje, prilikom usvajanja izvještaja o poslovanju za prethodnu godinu, članovima uprave privrednih društava sa većinskim učešćem državnog kapitala može se dodijeliti nagrada za izuzetne rezultate poslovanja u iznosu najviše do dvije prosječne mjesečne neto plaće isplaćene u Federaciji Bosne i Hercegovine u prethodnoj kalendarskoj godini prema posljednjem objavljenom podatku Federalnog zavoda za statistiku.

Odluku o nagradi iz stava 1. ovog člana donosi skupština privrednog društva sa većinskim učešćem državnog kapitala uz prethodnu pismenu saglasnost Vlade Federacije Bosne i Hercegovine.

Član 34.

Privredno društvo sa većinskim učešćem državnog kapitala, punomoćniku kojeg organ Federacije Bosne i Hercegovine ovlasti za učestvovanje u radu i odlučivanju na skupštini tog privrednog društva, uz saglasnost tog organa, može isplatiti naknadu za učestvovanje u radu i odlučivanju na skupštini u iznosu najviše do 1/2 prosječne neto plaće isplaćene u tom privrednom društvu u prethodna tri mjeseca.

VI – KAZNENE ODREDBE

Član 35.

Za prekršaj kaznit će se novčanom kaznom u iznosu od 50,00 KM do 3.000,00 KM odgovorno lice u privrednom društvu u kojem ovlaštenja po osnovu učešća državnog kapitala vrše organi Federacije Bosne i Hercegovine koje:

- 1) ne dostavi poziv za zakazanu skupštinu sa dnevnim redom i materijalima za svaku tačku dnevnog reda u skladu sa članom 10. stav 1. ovog Zakona,
- 2) ne dostavi odgovarajući akt u skladu sa članom 22. ovog Zakona,
- 3) postupa protivno odredbama čl. 23., 24. i 25.

Član 36.

Za prekršaj kaznit će se novčanom kaznom u iznosu od 50,00 KM do 3.000,00 KM član nadzornog odbora privrednog društva u kojem ovlaštenja po osnovu učešća državnog kapitala vrše organi Federacije Bosne i Hercegovine, imenovan ispred državnog kapitala, koji:

- 1) postupi protivno članu 15. ovog Zakona,
- 2) ne izvrši primopredaju dužnosti u skladu sa članom 17. ovog Zakona.

Za prekršaj kaznit će se novčanom kaznom u iznosu od 50,00 KM do 3.000,00 KM član nadležnog organa privrednog društva u kojem ovlaštenja po osnovu većinskog učešća državnog kapitala vrše organi Federacije, imenovan ispred državnog kapitala, koji glasa za razrješenje i imenovanje članova uprave bez pribavljene prethodne saglasnosti Vlade Federacije Bosne i Hercegovine iz čl. 18., 19. i 20. ovog Zakona.

Član 37.

Za prekršaj kaznit će se novčanom kaznom u iznosu od 50,00 KM do 3.000,00 KM član uprave privrednog društva sa većinskim učešćem državnog kapitala koji ne izvrši primopredaju dužnosti u skladu sa članom 21. ovog Zakona.

Član 38.

Za prekršaj kaznit će se novčanom kaznom u iznosu od 50,00 KM do 3.000,00 KM odgovorno lice u privrednom društvu u kojem ovlaštenja po osnovu učešća državnog kapitala vrše organi Federacije Bosne i Hercegovine koje:

- 1) ne izvrši smanjenje tri uzastopne mjesečne plaće zaposlenika tog privrednog društva, uključujući plaće i naknade članova nadzornog odbora, uprave i odbora za reviziju u skladu sa članom 30. ovog Zakona,
- 2) zaključi ugovor o mjesečnoj naknadi ili mjesečnoj neto plaći bez pribavljene saglasnosti iz čl. 31. i 32. ovog Zakona.

VII – PRELAZNE I ZAVRŠNE ODREDBE

Član 39.

Nadzor nad provođenjem ovog Zakona vrši Federalno ministarstvo energije, rudarstva i industrije.

Član 40.

Privredna društva u kojim ovlaštenja po osnovu učešća državnog kapitala vrše organi Federacije Bosne i Hercegovine dužna su uskladiti odredbe statuta sa ovim Zakonom u roku od šest mjeseci od dana stupanja na snagu ovog Zakona.

Član 41.

Na pitanja koja nisu regulisana ovim Zakonom primjenjuju se odredbe Zakona o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10) i Zakona o javnim preduzećima u Federaciji Bosne i Hercegovine („Službene novine Federacije BiH“, br. 8/05, 81/08 i 22/09).

Član 42.

Stupanjem na snagu ovog Zakona prestaje da važi poglavlje „III Javna preduzeća“ Zakona o plaćama i drugim materijalnim pravima članova organa upravljanja institucija Federacije Bosne i Hercegovine i javnih preduzeća u većinskom vlasništvu Federacije Bosne i Hercegovine („Službene novine Federacije BiH“, broj 12/09).

Član 43.

Ovaj Zakon stupa na snagu osmog dana od dana objavljivanja u „Službenim novinama Federacije BiH“, s tim da se član 30. ovog Zakona primjenjuje počev od godišnjeg obračuna privrednih društava sa većinskim učešćem državnog kapitala za 2012. godinu.

O B R A Z L O Ž E N J E

UZ NACRT ZAKONA O UPRAVLJANJU DRŽAVNIM KAPITALOM U PRIVREDNIM DRUŠTVIMA U FEDERACIJI BOSNE I HERCEGOVINE

I – USTAVNI OSNOV

Ustavni osnov za donošenje ovog Zakona sadržan je u odredbi tačke c) Amandmana VIII na Ustav Federacije Bosne i Hercegovine prema kojoj je u isključivoj nadležnosti Federacije utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou.

II – RAZLOZI ZA DONOŠENJE ZAKONA

Na nivou Federacije Bosne i Hercegovine, oblast upravljanja državnim kapitalom u privrednim društvima, odnosno vršenja ovlaštenja po osnovu učešća državnog kapitala u privrednim društvima do sada nije bila zakonski regulisana, pa tako pored ostalih značajnih pitanja do sada zakonom nije bilo utvrđeno koji su organi Federacije Bosne i Hercegovine ovlašteni za upravljanje državnim kapitalom u privrednim društvima sa učešćem državnog kapitala iz nadležnosti Federacije Bosne i Hercegovine.

Predmetna oblast, trenutno je jednim dijelom uređena odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala („Službene novine Federacije BiH“, broj: 35/11) i to u dijelu koji se odnosi na učestvovanje u radu i odlučivanju skupština privrednih društava sa učešćem državnog kapitala, predlaganje članova nadzornih odbora privrednih društava sa učešćem državnog kapitala, razrješenje dužnosti prije isteka mandata članova nadzornih odbora privrednih društava sa učešćem državnog kapitala, davanje saglasnosti za imenovanje članova uprava privrednih društava i razrješenje dužnosti prije isteka mandata članova uprava privrednih društava sa većinskim učešćem državnog kapitala.

Poseban značaj ove oblasti vidljiv je i iz pregleda organa Federacije Bosne i Hercegovine i privrednih društava u kojim ovi organi vrše ovlaštenja po osnovu učešća državnog kapitala u skladu sa Odlukom Vlade Federacije Bosne i Hercegovine o utvrđivanju liste privrednih društava u kojim ovlaštenja po osnovu učešća državnog kapitala vrše organi Federacije Bosne i Hercegovine („Službene novine Federacije BiH“, broj: 35/11).

U skladu sa navedenom Odlukom Vlada Federacije Bosne i Hercegovine neposredno vrši ovlaštenja po osnovu učešća državnog kapitala u privrednom društvu ArcelorMittal Zenica d.o.o.

Federalno ministarstvo poljoprivrede, vodoprivrede i šumarstva vrši ovlaštenja po osnovu učešća državnog kapitala u privrednim društvima, i to:

1. "Fabrika duhana Mostar" d.d. Mostar,

2. „Fabrika duhana Sarajevo” d.d. Sarajevo,
3. JP "Bosanskohercegovačke šume" d.o.o. Sarajevo,
4. JP "Šume Herceg Bosne" d.o.o. Mostar.

Federalno ministarstvo finansija – Federalno ministarstvo financija vrši ovlaštenja po osnovu učešća državnog kapitala u privrednim društvima, i to:

1. Lutrija Bosne i Hercegovine d.o.o. Sarajevo,
2. “Sarajevo osiguranje” d.d. Sarajevo,
3. Union banka d.d. Sarajevo,
4. Bor Banka d.d. Sarajevo.

Federalno ministarstvo trgovine vrši ovlaštenja po osnovu učešća državnog kapitala u privrednom društvu “Šipad” Export – Import d.d. Sarajevo.

Federalno ministarstvo prometa i komunikacija vrši ovlaštenja po osnovu učešća državnog kapitala u privrednim društvima, i to:

1. Dioničko društvo BH TELECOM Sarajevo,
2. JP BH POŠTA d.o.o. Sarajevo,
3. JP Hrvatske telekomunikacije d.o.o. Mostar,
4. Hrvatske pošte d.o.o. Mostar,
5. JP Međunarodni aerodrom “SARAJEVO” d.o.o Sarajevo,
6. JP BH Airlines d.o.o. Sarajevo,
7. “CESTE” d.d. Mostar,
8. “Sarajevoputevi” d.d. Sarajevo,
9. JP Ceste Federacije BiH d.o.o. Sarajevo,
10. JP Autoceste Federacije BiH d.o.o. Mostar,
11. JP Željeznice Federacije BiH d.o.o. Sarajevo,
12. Zavod za saobraćaj d.o.o. Sarajevo,
13. Holding preduzeće “Putevi BiH” Sarajevo.

Federalno ministarstvo energije, rudarstva i industrije vrši ovlaštenja po osnovu učešća državnog kapitala u privrednim društvima, i to:

1. JP Elektroprivreda BiH d.d. – Sarajevo,
2. JP “Elektroprivreda HZ HB” d.d. Mostar,
3. “BH-Gas” d.o.o. Sarajevo,
4. Željezara “Zenica” d.o.o. Zenica,
5. Unis d.d. Sarajevo,
6. Energoinvest d.d. Sarajevo,
7. Energopetrol d.d. Sarajevo,
8. Aluminijski zavod d.d. Mostar,
9. Bosnalijek d.d. Sarajevo,
10. RMU Banovići d.d. Banovići,
11. Hidrogradnja d.d. Sarajevo,
12. IP “Krivaja” d.o.o. Zavidovići,
13. “KTK Visoko” d.d. Visoko,
14. “Terminali Federacije” d.o.o. Sarajevo,
15. Remontni zavod d.d. Travnik,

16. "Agrokomerc" d.d. Velika Kladuša.

Federalno ministarstvo energije, rudarstva i industrije, putem Federalne direkcije za namjensku industriju, vrši ovlaštenja po osnovu učešća državnog kapitala u privrednim društvima, i to:

1. BNT Tvornica mašina i hidraulike d.d. Novi Travnik,
2. Pretis d.d. Vogošća,
3. UNIS Ginex d.d. Goražde,
4. "Igman" d.d. Konjic,
5. "BINAS" d.d. Bugojno,
6. PS Vitezit d.o.o. Vitez,
7. "Zrak" d.d. Sarajevo,
8. Tehničko remontni zavod Hadžići d.d. Hadžići,
9. "UNIS – Pretis" d.o.o. Vogošća (Alatnica),
10. "UNIS - GROUP" d.o.o. Ilidža.

Federalno ministarstvo okoliša i turizma vrši ovlaštenja po osnovu učešća državnog kapitala u privrednim društvima, i to:

1. Javno preduzeće Nacionalni park "UNA" d.o.o. Bihać,
2. HUTP "SALUS HOTEL STELA" d.o.o. Neum.

Potrebno je napomenuti da je u toku izrade Nacrta zakona uzeta u obzir i obaveza usklađivanja istog sa propisima Evropske unije, zatim da je u Kantonu Sarajevo oblast upravljanja državnim kapitalom već duži period regulisana posebnim zakonom, te da je i u zemljama iz okruženja prisutna praksa da se upravljanje državnim kapitalom u privrednim društvima reguliše zakonom, pa je tako ova oblast u Republici Hrvatskoj predmet regulisanja Zakona o upravljanju državnim imovinom (NN 145/10).

Uzimajući u obzir sve navedeno, u cilju regulisanja predmetne oblasti u najboljem interesu državnog kapitala i u skladu sa rješenjima prihvaćenim u uporednopravnim sistemima, sačinjen je tekst Nacrta zakona o upravljanju državnim kapitalom u privrednim društvima u Federaciji Bosne i Hercegovine, sa obrazloženjem po pojedinim poglavljima kako slijedi:

Opšte odredbe, obuhvataju čl. 1. do 3. kojim se određuje predmet regulisanja zakona, značenje pojmova i utvrđuje se da se ovim zakonom isključivo propisuje vršenje ovlaštenja po osnovu učešća državnog kapitala u privrednim društvima u kojim ova ovlaštenja vrše organi Federacije Bosne i Hercegovine, dok je za privredna društva u kojim ovlaštenja po osnovu učešća državnog kapitala vrše općine, gradovi i kantoni Federacije Bosne i Hercegovine propisano da vršenje tih ovlaštenja uređuju svojim propisima općine, gradovi i kantoni Federacije Bosne i Hercegovine, svako u okviru svojih nadležnosti.

Vršenje ovlaštenja u privrednim društvima sa učešćem državnog kapitala, obuhvata čl. 4. do 21. sa odjeljcima: Osnivanje i privredna društva od strateškog interesa, Način vršenja ovlaštenja u privrednim društvima sa učešćem državnog kapitala, Odlučivanje na skupštini i Nadzorni odbor i Uprava.

Osnivanje i privredna društva od strateškog interesa obuhvata čl. 4. i 5. kojim se uspostavlja zakonski osnov za osnivanje novih privrednih društava ali isključivo privrednih društava sa 100% učešćem državnog kapitala, te se uspostavlja zakonski osnov kako bi Vlada Federacije Bosne i Hercegovine mogla odlukom utvrditi da je pojedino privredno društvo koje obavlja djelatnosti u oblasti od interesa za Federaciju Bosne i Hercegovine, uključujući ali i ne ograničavajući se na: energetiku, industriju naoružanja i vojne opreme, komunikacije, komunalne djelatnosti i upravljanje javnim dobrima, od strateškog interesa za Federaciju Bosne i Hercegovine, s tim da na ovu odluku saglasnost daje Parlament Federacije Bosne i Hercegovine.

Privredna društva od strateškog interesa za Federaciju Bosne i Hercegovine imala bi poseban status po pitanju pokretanja i provođenja postupka stečaja i likvidacije, prinudnog izvršenja na pokretnoj i nepokretnoj imovini i prinudnog izvršenja blokadom računa kod poslovnih banaka, s tim da je predviđen i poseban oblik zaštite povjerilaca ovih privrednih društava, jer ukoliko bi Vlada Federacije Bosne i Hercegovine uskratila saglasnost za pokretanje i provođenje navedenih postupaka u tom slučaju solidarno odgovara za izmirenje potraživanja radi kojih je postupak pokrenut.

Način vršenja ovlaštenja u privrednim društvima sa učešćem državnog kapitala obuhvata čl. 6. i 7. kojim se daje nadležnost Vladi Federacije Bosne i Hercegovine da u privrednim društvima sa učešćem državnog kapitala iz nadležnosti Federacije Bosne i Hercegovine, neposredno ili putem federalnih organa uprave, vrši ovlaštenja po osnovu učešća državnog kapitala.

Članom 7. Vladi Federacije Bosne i Hercegovine daje se ovlaštenje da posebnom odlukom utvrđuje listu privrednih društava iz nadležnosti Federacije Bosne i Hercegovine u kojim ovlaštenja po osnovu učešća državnog kapitala vrše organi Federacije Bosne i Hercegovine, a što je i sada prisutno rješenje jer je trenutno navedena lista utvrđena Odlukom Vlade Federacije Bosne i Hercegovine o utvrđivanju liste privrednih društava u kojim ovlaštenja po osnovu učešća državnog kapitala vrše organi Federacije Bosne i Hercegovine („Službene novine Federacije BiH“, broj: 35/11).

Istom odredbom utvrđen je i postupak izmjena i dopuna navedene odluke, čime je ujedno normiran i postupak prenosa vršenja ovlaštenja po osnovu učešća državnog kapitala u privrednim društvima sa učešćem državnog kapitala u Federaciji Bosne i Hercegovine, sa jednog na drugi nivo vlasti.

Odlučivanje na skupštini obuhvata čl. 8. do 11. kojim se, u skladu sa važećim odredbama Zakona o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10) i na isti način kao što je ova materija trenutno regulisana odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala, propisuje način učestvovanja u radu i odlučivanju skupština privrednih društava sa učešćem državnog kapitala, obavezan sadržaj punomoći koju izdaje organ Federacije Bosne i Hercegovine koji pravo učestvovanja u radu i odlučivanju skupštine privrednog društava sa učešćem državnog kapitala ostvaruje putem punomoćnika, način dostavljanja punomoći privrednom društvu, opoziv punomoći, dostavljanje materijala za skupštinu i druga pitanja bitna za nesmetano odlučivanje i učestvovanje u radu skupštine privrednog društva sa učešćem državnog kapitala.

Nadzorni odbor obuhvata čl. 12. do 17. kojim je, u skladu sa važećim odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03) i na isti način kao što je ova materija trenutno regulisana odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala, utvrđen postupak izbora i predlaganja kandidata za članove nadzornih odbora ispred državnog kapitala na mandat od četiri godine, postupak predlaganja kandidata za članove nadzornog odbora ispred državnog kapitala koji se imenuju na period do 60 dana, ograničenja za predlaganje i imenovanje članova nadzornih odbora ispred državnog kapitala, dužnost postupanja članova nadzornih odbora imenovanih ispred državnog kapitala u skladu sa dobijenim obavezujućim uputstvima i dužnost izvještavanja, razrješenje dužnosti prije isteka mandata članova nadzornih odbora privrednih društava imenovanih ispred državnog kapitala i druga bitna pitanja.

Posebno je potrebno napomenuti da je članom 14. utvrđeno da se za jednog člana nadzornog odbora ispred državnog kapitala u privrednom društvu sa većinskim učešćem državnog kapitala imenuje kandidat kojeg predloži Savez samostalnih sindikata Bosne i Hercegovine, a u cilju obezbjeđenja višeg stepena zaštite prava zaposlenika.

Uprava obuhvata čl. 18 do 21. kojim je, na isti način kao što je ova materija trenutno regulisana odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala, propisan postupak izbora kandidata i imenovanja članova uprave privrednih društava sa većinskim učešćem državnog kapitala na mandat od četiri godine, postupak izbora kandidata i imenovanja članova uprave privrednih društava sa većinskim učešćem državnog kapitala na period do šest mjeseci, razrješenje dužnosti prije isteka mandata članova uprave privrednih društava sa većinskim učešćem državnog kapitala i druga bitna pitanja.

Evidencija i administrativna kontrola akata, obuhvata čl. 22. do 25. kojim se uspostavlja mehanizam za efikasniju kontrolu poslovanja i zakonitosti unutrašnje organizacije i internih akata privrednih društava, ali isključivo privrednih društava sa većinskim učešćem državnog kapitala.

Članom 22. utvrđena je obaveza privrednih društava sa većinskim učešćem državnog kapitala da organu Federacije Bosne i Hercegovine koji u tom društvu vrši ovlaštenja po osnovu većinskog učešća državnog kapitala dostavlja obavještenja o značajnim događajima za privredno društvo ili za njegova zavisna društva, a u cilju obezbjeđenja dovoljnog broja podataka putem kojih bi nadležni organ mogao što efikasnije pratiti stanje, kako u tom privrednom društvu, tako i u cjelokupnoj oblasti za koju je osnovan.

Članovima 23. do 25. uređuje se postupak administrativne kontrole akata koji obuhvata kontrolu usklađenosti odgovarajućih akata privrednih društava sa većinskim učešćem državnog kapitala i akata zavisnih društava sa zakonima, podzakonskim aktima i propisima Evropske unije. Istovremeno putem navedene kontrole omogućilo bi se i usaglašavanje sadržaja akata različitih privrednih društava sa većinskim učešćem državnog kapitala u Federaciji Bosne i Hercegovine u kojim su trenutno unutrašnja organizacija, poslovanje i druga bitna pitanja regulisana na različite načine, pri čemu je potrebno napomenuti da je mogućnost administrativne

kontrole akata privrednih društava predviđena i propisima EU (Direktiva 2009/101/EC od 16.09.2009. godine, Poglavlje 4.).

Posebne odredbe o postupku za upis i promjenu podataka u javnim registrima, obuhvataju čl. 26. do 29. kojim se propisuje poseban postupak upisa i promjene podataka u javnim registrima o privrednim društvima u kojim ovlaštenja po osnovu učešća državnog kapitala vrše organi Federacije Bosne i Hercegovine, pri čemu se pod javnim registrima podrazumjevaju: Registar poslovnih subjekata koji vode nadležni registarski sudovi u Federaciji Bosne i Hercegovine, Registar vrijednosnih papira u Federaciji Bosne i Hercegovine i drugi registri u kojim se evidentiraju podaci o privrednim društvima.

Članom 27. utvrđeno je na osnovu koje isprave se u javnim registrima vrši promjena podataka o organima Federacije Bosne i Hercegovine koji u privrednim društvima vrše ovlaštenja po osnovu učešća državnog kapitala, što trenutno u praksi predstavlja velike poteškoće, te da su u postupku upisa i promjene ovih podataka organi Federacije Bosne i Hercegovine oslobođeni plaćanja svih taksi i naknada, kao što su organi Federacije Bosne i Hercegovine oslobođeni plaćanja svih taksi i naknada i u svim drugim sudskim i upravnim postupcima.

Prema članu 28. ukoliko se postupak za upis i promjenu podataka u javnim registrima vodi po zahtjevu privrednog društva sa učešćem državnog kapitala, to privredno društvo nije oslobođeno plaćanja taksi i naknada, ali plaćanje taksi i naknada ne može biti uslov za izvršenje zahtjevanog upisa i promjene podataka, a to iz razloga što je trenutno prisutna praksa da javni registri upis i promjenu podataka po zahtjevu privrednih društava sa učešćem državnog kapitala koja se nalaze u teškoj ekonomskoj situaciji uslovljavaju plaćanjem visokih naknada i taksi čime se dovodi u pitanje nastavak nesmetanog poslovanja tih privrednih društava koja imaju veliki broj zaposlenika.

Članom 29. propisano je da javni registri koji pored ostalih podataka evidentiraju i podatke koji se odnose na nadzorne odbore i uprave privrednih društava sa većinskim učešćem državnog kapitala, evidentiranje prvog imenovanja i svakog novog imenovanja i razrješenja članova nadzornih odbora i uprava ovih privrednih društava mogu vršiti isključivo ukoliko podnosilac zahtjeva za evidentiranje promjena pored ostalih potrebnih dokumenata dostavi i odgovarajući akt Vlade Federacije Bosne i Hercegovine.

Plaće i naknade članova organa upravljanja, obuhvata čl. 30. do 34. kojim je uz manje izmjene regulisana materija koja je do sada bila predmet regulisanja poglavlja „III Javna preduzeća” Zakona o plaćama i drugim materijalnim pravima članova organa upravljanja institucija Federacije Bosne i Hercegovine i javnih preduzeća u većinskom vlasništvu Federacije Bosne i Hercegovine („Službene novine Federacije Bosne i Hercegovine“, broj 12/09), koje stupanjem na snagu ovog zakona prestaje da važi.

Odredbama ovog poglavlja utvrđuje se maksimalni iznos naknada za predsjednika i članove nadzornih odbora privrednih društava sa većinskim učešćem državnog kapitala, maksimalni iznos mjesečne neto plate članova uprave privrednih društava sa većinskim učešćem državnog kapitala, maksimalni iznos nagrade za izuzetne rezultate poslovanja, te se predviđa mogućnost naknade za punomoćnika ispred državnog kapitala za učestvovanje u radu i odlučivanju na skupštini privrednog društva sa većinskim učešćem državnog kapitala.

Posebno je potrebno napomenutu da je članom 30. propisano da ukoliko privredno društvo sa većinskim učešćem državnog kapitala u godišnjem obračunu iskaže gubitak, u tom privrednom društvu, u roku od 30 dana, uvode se mjere za smanjenje troškova poslovanja uz obavezno uvođenje mjere smanjenja tri uzastopne mjesečne plaće zaposlenika tog privrednog društva, uključujući plaće i naknade članova nadzornog odbora, uprave i odbora za reviziju, s tim da se u slučaju smanjenja mjesečnih plaća i naknada isključuje primjena odredaba važećih kolektivnih ugovora, ugovora o radu i drugih akata kojim su utvrđeni iznosi ili najniži iznosi plaća i naknada.

U članu 43. utvrđeno je da se član 30 primjenjuje, počev od godišnjeg obračuna privrednih društava sa većinskim učešćem državnog kapitala za 2012. godinu.

Kaznene odredbe, obuhvataju čl. 35. do 38. kojim su propisni prekršaji sa utvrđenim novčanim kaznama u slučaju kršenja odredaba ovog zakona i to za odgovorna lica u privrednim društvima, članove nadzornih odbora imenovane ispred državnog kapitala i članove uprave privrednih društava sa većinskim učešćem državnog kapitala.

Prelazne i završne odredbe, obuhvataju čl. 39. do 43. kojim je propisan nadzor nad provođenjem ovog zakona, rok za usklađivanje statuta privrednih društava sa učešćem državnog kapitala sa odredbama ovog zakona, primjena odredaba Zakona o privrednim društvima na pitanja koja nisu regulisana ovim zakonom, prestanak važenja poglavlja „III Javna preduzeća” Zakona o plaćama i drugim materijalnim pravima članova organa upravljanja institucija Federacije Bosne i Hercegovine i javnih preduzeća u većinskom vlasništvu Federacije Bosne i Hercegovine („Službene novine Federacije Bosne i Hercegovine“, broj 12/09) i stupanje na snagu.

III – FINANSIJSKA SREDSTVA

Za provođenje ovog zakona nije potrebno obezbijediti dodatna sredstva u Budžetu Federacije Bosne i Hercegovine za 2011. godinu.